



গণপ্রজাতন্ত্রী বাংলাদেশ সরকার

তথ্য অধিদফতর



PRESS INFORMATION DEPARTMENT. GOVERNMENT OF THE PEOPLE'S REPUBLIC OF BANGLADESH

তথ্যবিবরণী

নম্বর-২৫৬

রাজশাহী বিভাগীয় শিশুশ্রম কল্যাণ পরিষদের সভা অনুষ্ঠিত

রাজশাহী; ৭ বৈশাখ (২০ এপ্রিল):

রাজশাহী বিভাগীয় শিশুশ্রম কল্যাণ পরিষদের ২০তম সভা আজ সোমবার (২০ এপ্রিল) দুপুরে বিভাগীয় কমিশনার কার্যালয়ের সম্মেলন কক্ষে অনুষ্ঠিত হয়েছে। বিভাগীয় কমিশনারের পক্ষে অতিরিক্ত বিভাগীয় কমিশনার ড. চিত্রলেখা নাজনীন এ সভায় সভাপতিত্ব করেন। সভায় বিভাগীয় শিশুশ্রম কল্যাণ পরিষদের সদস্যবৃন্দ শিশুশ্রম বন্ধে ও শিশুদের কল্যাণে নিজ নিজ দপ্তরের কার্যক্রম তুলে ধরেন।

বজ্রাগণ শিশুশ্রমে জড়িত শিশুদের চিহ্নিত করে তাদের শিশুশ্রম মুক্তকরণে উপযুক্ত ও টেকসই পুনর্বাসনের ওপর গুরুত্বারোপ করেন। এসময় কলকারখানা ও প্রতিষ্ঠান পরিদর্শন অধিদপ্তরের বগুড়া কার্যালয়ের পক্ষ থেকে সভাকে জানানো হয়, চলতি বছর উক্ত দপ্তরের ৮০ জন শিশুর শিশুশ্রম নিরসনের লক্ষ্যমাত্রার বিপরীতে ৬০ জন শিশুকে শিশুশ্রম মুক্ত করা হয়েছে। অন্যদিকে একই দপ্তরের পাবনা অফিস জানিয়েছে, তারা ৭০ জনের লক্ষ্যমাত্রার বিপরীতে ৬০ জন শিশুকে শিশুশ্রম মুক্ত করেছে। এ দপ্তরের পক্ষ থেকে শিশুশ্রম বিষয়ক ডাটাবেজ এবং শিশুশ্রম মুক্ত করা শিশুদের জন্য উপবৃত্তিসহ বিভিন্ন আর্থিক সহযোগিতার প্রয়োজনীয়তার কথা জানানো হয়।

মহিলা বিষয়ক দপ্তরের পক্ষ থেকে জানানো হয়, তাদের অধীনে শিশু বিকাশ কেন্দ্রে ১ থেকে ১৬ বছর বয়স পর্যন্ত শিশুদের ভর্তির সুযোগ রয়েছে। শিশু বিকাশ কেন্দ্রের শিশুদের সরকারি খরচে খাবার, আবাসন, শিক্ষা ও চিকিৎসাবিনোদনের ব্যবস্থা করা হয়।

সমাজসেবা দপ্তর জানিয়েছে, সরকারি শিশু পরিবারগুলোতে ৬ থেকে ৯ বছর বয়স পর্যন্ত এতিম ও সুবিধাবঞ্চিত শিশুদের ভর্তি করা হয় এবং সেখানে শিশুরা ১৮ বছর বয়স পর্যন্ত থাকতে পারে। এছাড়া ৯ বছর বয়সের উর্ধ্বের শিশুদের পুনর্বাসনের জন্য সমাজসেবা অধিদপ্তরের অধীনে বিভিন্ন পুনর্বাসন কেন্দ্র রয়েছে।

সভাপতির বক্তব্যে চিত্রলেখা নাজনীন বলেন, যে-সব শিশুদের শিশুশ্রম থেকে ফিরিয়ে আনা হচ্ছে তাদের হালনাগাদ তথ্য সংরক্ষণ, তদারকি এবং শিক্ষা প্রতিষ্ঠানমুখী করতে হবে।

এসময় তিনি, ব্যাপক প্রচারের জন্য কারিগরি শিক্ষা প্রতিষ্ঠানসমূহের সুযোগ-সুবিধা সম্বলিত ভর্তি বিজ্ঞাপন শিশুশ্রম কল্যাণ পরিষদের সদস্যের নিকট সরবরাহের জন্য সংশ্লিষ্ট প্রতিষ্ঠানগুলোকে নির্দেশ প্রদান করেন।

.....
তৌহিদ/আতিক/আলীম/রুহুল/হালিম/২০২৬/১৫:৩০ঘ.